



Komunikadu Imprensa

Tribunál ba Kontas

24 Juñu 2016

Tribunál Superiór Administrativu, Fiskál no Kontas hala'ò julgamentu dahuluk ba kazu efetivasaun responsabilidade infrasaun finanseiru iha UNTL

Iha 20 to'ò 22 Juñu 2016, Tribunál Superiór Administrativu, Fiskál no Kontas hahu hala'ò nia funsaun relaciona ho legalidade despeza públika no julgamentu kona-ba Estadu nia kontas¹. Julgamentu ba dahuluk ne'e hala'ò ba kazu efetivasaun ba responsabilidade infrasaun finanseiru² ne'ebé envolve mandadu nain 14 hosi Universidade Nasionál Timor Loro Sa'e (UNTL) hasoru Estadu Timor-Leste. Julgamentu ne'e hala'ò iha Tribunál Rekursu, Caikoli-Dili.

Antes ne'e, Tribunál Superiór Administrativu, Fiskál no Kontas simu rekerimentu hosi ministériu públiku³ bazeia ba rezultadu auditoria kâmara ba kontas ba jestaun ezekusaun orsamentu iha UNTL, iha 2011 no 2012, katak iha infrasaun finanseiru iha UNTL.

“Prosesu ne'e nu'udar pasu importante ida tan atu asegura katak utilizaun no jestaun ba orsamentu estadu nian ne'ebé alokadu ba área relevante sira-ne'e uja tuir nia dalan, responsavel no akuntavel,” dehan Luis de Oliveira Sampaio, Diretor Ezekutivu JSMP.

JSMP apresia Tribunál Superiór Administrativu, Fiskál no Kontas tanba hahu hala'ò primeiru julgamentu verifika servisu auditoria kâmara ba kontas no ministériu públiku ne'ebé apresenta faktus iregularidade ba efetivasaun responsabilidade infrasaun finanseiru iha instituisaun UNTL nu'udar instituisaun Estadu.

JSMP hein katak julgamentu kazu sira hanesan ne'e la termina de'it iha kazu UNTL ne'e, maibé mós ba kazu sira seluk ne'ebé auditór kâmara kontas sira deskobre no hetan infrasaun iha utilizaun orsamentu estadu nian.

¹ Artigu 129 (3) Kontituisaun RDTL define katak kompeténsia ba Tribunál Supremu Administrativu, Fiskál no Kontas nian, nu'udar instánsia mesak ida, halo fiskalizasaun kona-ba legalidade despeza públika no jugamentu konaba Estadu nia-konta.

² Artigu 2 letra (2) Lei Nú. 9/2011, Lei Orgánika da Kâmara ba Kontas hosi Tribunál Superiór Administrativu, Fiskál no Kontas kona-ba jurisdisaun no kompeténsia.

³ Artigu 67 Nú.1 letra (a) Lei Nú. 9/2011, Lei Orgánika da Kâmara ba Kontas hosi Tribunál Superiór Administrativu, Fiskál no Kontas kona-ba kompeténsia rekere julgamentu hosi Ministériu Públiku.

Rua setubal, Colmera, Dili Timor Leste

PoBox: 275

Telefone: 3323883 |77295795

www.jsmp.tl

Facebook: www.facebook.com/timorleste.jsmp

Twitter: @JSMPtl

JSMP husu atu Tribunál Superiór Administrativu, Fiskál no Kontas bele kontinua halo kontrolu ba orsamentu estadu ba instituisaun sira seluk inklui instituisaun autonomia ka independente sira seluk ne'ebé simu fundus hosi estadu, nune'e bele garante sistema jestaun finanseiru ne'ebé di'ak transparante no akontavel iha futuru.

Iha kazu ne'e Ministériu Públiku rekere katak Reitór UNTL simu saláriu ho valór fulan ida US\$3,000.00 resin, no Konsellu Jestaun UNTL la halo kontrolu di'ak ba reseitas no despeza UNTL nian. Aleinde ne'e, despeza ne'ebé UNTL jere la liu-hosi sistema finanseiru ne'ebé di'ak no hamosu prejuizu US\$14,000.00 relaciona ho atividade UNTL ne'ebé falsifika resivu no lista partisipante ne'ebé la apropriadu.

Ministériu Públiku mós rekere katak iha pagamentu insentivu ilegál ba direjentes/funsióariu sira inklui sira ne'ebé okupa kargu xefia. Faktu seluk katak, selu *over time* ka oras servisu ne'ebé liu oras estra-ordináriu ninian no reseitas ne'ebé UNTL hetan la depozita ba iha kontas ofisiál maibé ba fali kontas ilegál 6 ne'ebé loke iha banku ANZ no BNU. Tanba ne'e hamosu prejuizu ba estadu hamutuk US\$1,709.40.00.

Iha prosesu julgamentu durante lora 3 ne'e, aliende konfirma faktus ba ministériu públiku no defeza mandadu sira nian, rona mós depoimentu hosi testemuña (auditór) sira. Iha prosesu ne'e auditór sira kontinua konfirma faktus sira iha akuzasaun, katak infrasaun sira ne'ebé imputa ba mandadu 14 ne'e, bazeia ba faktu ne'ebé sira deskobre wainhira sira halo auditória iha instituisaun UNTL. Auditór sira mós deskobre katak iha konta 2 la'os ofisiál hosi konta 6 ne'ebé loke iha banku ANZ no BNU. Conta 2 ne'e loke hosi eis reitor UNTL, Benjamin Corte-Real iha 2003 no taka iha 2011.

Depoizide konfirma faktus no rona testemuña sira, Tribunál Superior Administrativu, Fiskál no Kontas marka fali prosesu julgamentu kontinuaun ba iha 01 Jullu 2016, tuku 09:00 dader ho agenda rona fali deklarasaun hosi mandadu sira ne'ebé sei hahu uluk ho Aurelio Guterres nu'udar, Reitór UNTL iha periodu ne'ebá.

Julgamentu ne'e prezide hosi juiza conseleira, Dra. Naterçia Maria Gusmão. Ministériu Públiku representa hosi Dr. Alfeio da Costa no Dr. Pasçao de Rosa Alves. Entretantu mandadu sira hetan defeza hosi mandatáriu Dr. Cancio Xavier hosi defensoria públiku no Dr. Jose Guterres no Dr. Napoleão da Costa nu'udar advogadu privadu.

Atu hetan informasaun liutan favor kontaktu:

Luis de Oliveira Sampaio
Diretór Ezekutivu JSMP
Email: luis@jsmp.minihub.org